

瑜伽師地論本地分菩薩地真實義品講義十一(2012)

一、四種菩薩妙陀羅尼〔瑜伽卷45〕

云何菩薩妙陀羅尼？

當知如是妙陀羅尼略有四種：

一者、法陀羅尼，二者、義陀羅尼，三者、咒陀羅尼，四者、能得菩薩忍陀羅尼。

●云何菩薩法陀羅尼？

謂諸菩薩獲得如是念慧力持，由此力持，聞未曾聞，言未溫習、未善通利，名句文身之所攝錄，次第錯縱、次第結集無量經典，經無量時能持不忘，是名菩薩法陀羅尼。

●云何菩薩義陀羅尼？

謂如前說。此差別者，即於彼法無量義趣，心未溫習、未善通利，經無量時能持不忘，是名菩薩義陀羅尼。

●云何菩薩咒陀羅尼？

謂諸菩薩獲得如是等持自在，由此自在加被能除有情災患諸咒章句，令彼章句悉皆神驗，第一神驗，無所唐捐，能除非一種種災患，是名菩薩咒陀羅尼。

●云何菩薩能得菩薩忍陀羅尼？

謂諸菩薩成就自然堅固因行，具足妙慧。

獨處空閑，寂無言說，曾無有物，見路而行。知量而食，不雜穢食，一類而食。常極靜慮，於夜分中少眠多寤。

於佛所說得菩薩忍諸咒章句，能諦思惟。

其咒詞曰：

壹胝 密胝 吉胝毗 羸底（丁理反） 鉢陀膩 莎訶

即於如是咒章句義，審諦思惟、籌量、觀察。彼於如是咒章句義如是正行，不從他聞，自然通達；了知如是諸咒章句都無有義，是圓成實，但唯無義；如實了知此章句義，所謂無義，是故過此，不求餘義，齊此名為妙善通達咒

章句義。

彼於如是咒章句義正通達已，即隨此義，不從他聞，自正通達一切法義。

謂於此義如是通達，一切言說所說諸法自性之義皆不成實，唯有諸法離言自性是自性義。彼於諸法此自性義正通達已，過此更無餘義可求。由於此義善通達故，獲得最勝廣大歡喜。

由是菩薩得陀羅尼，當言已得此陀羅尼章句所立菩薩勝忍。得此忍故，是諸菩薩不久當得淨勝意樂，已依上品勝解行地勝忍而轉。當知是名菩薩所有能得菩薩忍陀羅尼。

此中菩薩法陀羅尼、義陀羅尼，若過第一無數大劫，已入清淨勝意樂地，所得決定堅住廣大。從此以下，或以願力、或依靜慮，雖有獲得，而不決定，亦不堅住、亦不廣大。如說法義二陀羅尼，呪陀羅尼，當知亦爾。能得菩薩忍陀羅尼，如前所釋，即如是得。

若諸菩薩具四功德，方獲如是諸陀羅尼，非隨闕一。

何等名為四種功德？

一者、於諸欲中，無所貪著。

二者、於他勝事不生妒忌，不嫉他榮。

三者、一切所求等施無悔。

四者、於正法中，深生忻樂；忻樂法者，於菩薩藏及菩薩藏摩怛理迦深心愛樂。